

ایونٹنگ گو جری نیوز بلیٹن مو رخہ 14 نومبر 2024

یوہ آکا شوانی جموں بے ظفر اقبال تے عبدالرحمن شاپین تیں خبر سُنو۔ پہلاں خاص خاص خبر۔

*1- وزارت داخلہ غو کہنو بے جے سال 2019 تیں وزیر اعظم نریندر مو دی غی سربراہی آلی حکومت غے تحت جموں کشمیر مانہہ دہشت گردانہ واقعات مانہہ 70 فیصدی توں وی متی کمی آئی ہے۔

*2- جموں کشمیر یوٹی انتظامیہ غی طرفوں پورا مرکزی زیر انتظام علاقہ مانہہ 3 ہزار ڈیری فارم قائم کرن غو ہدف مقرر کیو گیو ہے۔

*3- وزیر اعظم نریندر مو دی بار غے روز تیں نا تجریہ، برازیل تے گیانہ غا 6 روزہ دورہ ور جا رہیا ہیں۔

*4- تے ضلع انتظامیہ کشتواڑ غی طرفوں پلک تاریخی چوگان میدان مانہہ اک بڑا قبائلی تہوار غی میزبانی کی جا رہی ہے۔

خبران غی تفصیل نال پہلاں ظفر اقبال۔

Terror Incidents JK

وزارت داخلہ نے پارلیمانی پینل نانہہ جانکاری دیتاں واں دسیو ہے جے جموں کشمیر مانہہ وزیر اعظم نریندر مو دی قیادت آلی سرکار غا سال 2019 مانہہ بنن توں بعد دہشت گردی غا معاملات مانہہ 70 فیصدی کمی آئی ہے۔ مرکزی وزارت داخلہ غا سیکریٹری گویند موہن نے داخلی معاملات بارے بنائی گئی پارلیمنٹری سٹینڈینگ کمیٹی نانہہ یاه جانکاری دیتاں واں دسیو۔ انہاں نے مزید جانکاری دیتاں واں دسیو جے گذشتہ 5 بہراں مانہہ دہشت گردی غا معاملات مانہہ کمی آن غے باوجود دہشت گرداں گا گروپ جن مانہہ لشکر طیبہ تے جیش محمد شامل ہیں ان دہشت گرد تنظیمان نے خطرہ غی دھمکی دین مانہہ کوئی کمی باقی نہیں چھوڑی۔ وزارت داخلہ غا سیکریٹری نے دفعہ 370 غا سال 2019 مانہہ 5 اگست نانہہ مرکز غی طرفوں توڑن غی اہمیت بارے جانکاری دیتاں واں دسیو جے 5 اگست 2019 نانہہ مرکز نے جموں کشمیر نانہہ دو مرکزی زیر انتظام علاقہ بنا غے علاقہ مانہہ امن قانون نانہہ اپنے ذمہ لے لیو تھو۔ وزارت داخلہ غا اک عدادو شمار غے مطابق سال 2019 مانہہ دہشت گرد حملہ مانہہ 50 شہریاں غی موت واقع ہو گئی تھی تے رواں سال مانہہ دہشت گرد حملان مانہہ ماریا جان آلا شہریاں غی تعداد کہٹ غے 14 آگئی ہے۔ تے اسے طرح سال 2023 مانہہ دہشت گرد حملان مانہہ ماریا گیا شہریاں غی تعداد 5 تھی۔

Dairy Farm Jk

یوٹی انتظامیہ نے دودھ غی پیداوار بارے سیکٹر نانہہ فروغ دین واسطے جموں کشمیر مانہہ 3 ہزار ڈیری فارم قائم کرن گو ہدف رکھيو ہے۔ آکاشوانی جموں گا نمائندہ نے خبر ٹوری ہے جے 3 ہزار نواں ڈیری فارم قائم کرن توں دودھ غی پیداوار مانہہ آگلا 5 بہراں مانہہ کافی باہدو وے گو۔ قابل ذکر ہے جے یوٹی انتظامیہ نے بکھ بکھ سکیمان غے تحت دودھ غی پیداوار بدھائی ہے۔ دودھ غی پیداوار 25 لکھ میٹرک ٹن توں بدھا غے 45 لکھ میٹرک ٹن ہو

ئی ہے۔ جد کہ روز مرہ مانہہ دودھ غی پیداوار 2 لکھ توں بدھ غے 8 عشراریہ 5 لکھ لیٹر ہو ئی ہے۔ سرکار نے مال مویشی واسطے خوراک چارہ بارے 3 ہزار 6 ہیکٹر زمین جس مانہہ خوراک بیج تیار کیا جا ئیں گا وے دودھ غی پیداوار کرن آلاں نانہہ دستیاب کرائی جا ئے گی۔

Goa Film Festival

اطلاعات و نشریات وزارت غی طرفوں قومی فلم ترقیات تے کارپوریشن ایف ڈی سی تے گواہ تفریحی سوسائٹی غا اشتراک سنگ گواہ مانہہ 25 تیں 28 نومبر 2024 تک 55 ووں بھارت غو بین القوامی فلم تہوار منعقد کیو جا رہیو ہے۔ آکاشوانی جموں غا نامہ نگار نے دسیو ہے جے یوہ فلم تہوار پنجی گواہ مانہہ وے گو۔ تے اس سال اس تہوار غو عنوان ہے ”نوجوان فلم بنان آلا تے ہن مستقبل ہے“ اس سال نوجوان نسل غی حوصلہ افزائی بارے نوی سکیشن تے اعزازی ژمرہ بنایا گیا ہیں۔ اس بارے اعزاز اک سرٹیفکیٹ تے 5 لکھ غا نقد انعام ور مشتمل ہیں۔ یہ اعزاز بھارتی فلماں گا 4 بڑا اداکار جن مانہہ راج کپور، فلم میکر تین سنہا، تیلگو ستار اکھینی ناگیشور راؤ تے گلوکار محمد رفیع شامل ہیں ان نانہہ خراج عقیدت پیش کرن گا پروگرام مانہہ شامل ہیں۔

NIA Terror Links

قومی تحقیقاتی ایجنسی این آئی اے نے لشکر طیبہ دہشت گرد تنظیم غی دا ریزسٹنٹ فرنٹ سنگ منسلک اک ملزم غی غیر منقولہ جائیداد نانہہ ضبط کر لیو ہے۔ قابل ذکر ہے جے رواں سال غافروری مہینہ مانہہ دو غیر مقامی افراد غی سرینگر مانہہ قتل معاملہ غا تناظر مانہہ این آئی اے نے یاه کاروائی کی ہے۔ ضلع سرینگر مانہہ زلادگر غا مقام ور یاه جائیداد ضبط کی گئی ہے۔ اس معاملہ غو اہم ملزم موجودہ وقت مانہہ سینٹرل جیل سرینگر مانہہ بند ہے۔

Swachta Pledge

اطلاعات و نشریات وزارت غا سینئر اقتصادی صلاحکار رابندر کمار جینا نے اج ویڈیو کا نفرنسنگ غے ذریعے عہدیداران نانہہ اکھٹاں ہی حلف دوايو۔ آکاشوانی غا ڈائریکٹر جنرل ڈاکٹر پراگیہ پلیوال گور، اضافی ڈائریکٹر جنرل ایل مدھو ناگ تے دوجا سینئر عہدیداران نے آکاشوانی بھون نوی دہلی مانہہ سو چھتا حلف لیو۔

PM Homage

وزیراعظم نریندر مودی نے ملک غا سابقہ وزیر اعظم پنڈت جواہر لال نہرو نانہہ ان غی برسی ور خراج عقیدت پیش کیو ہے۔ اپنا اک سماجی میڈیا پوسٹ مانہہ جناب مودی نے سابقہ وزیر اعظم پنڈت جواہر لال نہرو نانہہ خراج عقیدت پیش کیو ہے۔

یہ خبر تم آکاشوانی جموں تیں سن رہیا ہیں خبراں غا باقی حصہ نال عبدالرحمن شاہین۔

PM Visit

وزیراعظم نریندر مودی بارے روز تیں نا تجریہ، برازیل تے گیانہ غا 6 روزہ دورہ ور جا رہیا ہیں۔ کل شام نانہہ نوی دہلی مانہہ ذرائع ابلاغ سنگ بات چیت کرتاں واں خارجہ سیکریٹری اکرم مصری نے کہیو ہے جے اس مہینہ غی 18 تے 19 تاریخ نانہہ جناب مودی 19 ویں جی ٹوانٹی کا نفرنس مانہہ شرکت بارے برازیل غو دورو کرینگا۔ تے وزیر اعظم غو برازل غو یوہ تیجو سرکاری دورو وے گو۔ جناب مصری نے ذکر کیو جے وزیر

اعظم 2014 مانہہ برازیل گیا تے فر بریکس سربراہ کا نفرنس مانہہ شرکت واسطے 2019 مانہہ برازیل گیا۔ انہاں نے کہیو جے اس با ری جی ٹوائٹی کا نفرنس وی خصوصی ہے۔ کیونجے اس بار افریقی یونین بطور ممبر جی 20 گروپ مانہہ شامل ہے۔ اس سربراہ کا نفرنس غے دوران وزیر اعظم پچھلا 2 بہراں غے دوران بھارت غی میزبانی مانہہ جی 20 نوی دہلی غا لیڈراں غا اعلانیہ تے عالمی اہمیت غا معاملات ور بھارت غی صورتحال نانہہ آگے چلا ویں گا۔ جی 20 سربراہ کا نفرنس نے اک پاسے متوقع طور وزیر اعظم کئی لیڈراں سنگ وی ملاقات کرینگا۔ خارجی معاملات بارے وزارت مانہہ اقتصادی تعلقات بارے سیکریٹری دمو روی نے دسیو ہے جے ناٹجریہ غا صدر بولا احمد تنیو غی طرفوں دعوت دتا جان ور وزیر اعظم نریندرمودی 16 تے 17 نومبر نانہہ ناٹجریہ غا دورہ ور رہینگا۔ جناب روی نے کہیو جے مغربی افریقہ خطہ مانہہ وزیر اعظم نریندرمودی غو یوہ پہلو دورو وے گو تے پچھلا 17 بہراں مانہہ بھارتی وزیر اعظم غو ناٹجریہ غو یوہ پہلو دورو وے گو۔ اس دورہ غے دوران وزیر اعظم بھارت اور ناٹجریہ بشکار حصے داری حکمت عملی غو جائز لینگا تے دو طرفہ تعلقات نانہہ مزید بدھان بارے تبادلہ خیال کرینگا۔ تے ناٹجریہ مانہہ رہ رہی بھارتیہ برادری سنگ وی خطاب کرینگا۔ سیکریٹری مشرق جے دیپ ماژمدار نے کہیو ہے جے گیا نہ غا صدر محمد عرفان علی غی دعوت ور وزیر اعظم جناب مودی اس مہینہ غی 19 تے 20 تاریخ نانہہ کیانہ غو دورو کرینگا۔ انہاں نے دسیو جے ادھی صدی تیں وی زیادہ غا عرصہ مانہہ بھارتیہ وزیر اعظم غو کیانہ غو یوہ پہلو دورو ہے۔ وزیر اعظم ات گیا نہ غی پارلیمنٹ سنگ خطاب کرینگا۔ تے ات بس رہی بھارتیہ برادری سنگ وی ملیں گا۔ وزیر اعظم ات دوجی کاریکون بھارت کا نفرنس مانہہ وی شرکت کریں گا تے کاریکون ممبر ملکاں غا لیڈراں سنگ میٹنگ کرینگا۔

Dominica PM Modi

ڈومینیکا نے اپنا سب توں بڑا قومی اعزاز سنگ وزیر اعظم نریندرمودی نانہہ نوازن غو اعلان کیو ہے۔ یاد رہے جے ڈومینیکا غی کوویڈ 19 غی عالمی وباء غے وقت بھارت نے مدد کی تھی۔ تے اس غے نال ہی بھارت ڈومینیکا غا رشتہ مضبوط ہوا تھا۔ ڈومینیکا غا صدر سنلونی برٹن بھارت کوریوم اجلاس جہیڑو جے اس مہینہ غی 19 تے 21 تاریخ نانہہ جیارج ٹاؤن کیانہ مانہہ منعقد ہون جا رہی ہے ات وزیر اعظم مودی نانہہ یوہ اعزاز دتو جا ئے گو۔ ڈومینیکا غا وزیر اعظم غا دفتر غا اک بیان غے مطابق بھارت نے کوویڈ 19 غی وباء غے ویلے سال 2021 مانہہ 70 ہزار اسٹرا زینکا کوویڈ 19 غی خوراک ڈومینیکا نانہہ فراہم کی تھی۔ یوہ اعزاز وزیر اعظم مودی نانہہ بھارت غی لگاتار ڈومینیکا غی صحت، تعلیم تے اطلاعی تکنیک مانہہ مدد کرن واسطے وی دتو جا رہیو ہے۔ ڈومینیکا غا وزیر اعظم نریندرمودی نانہہ اس اعزاز سنگ نوازن ور ہم نانہہ خوشی محسوس ہو رہی ہے۔ انہاں نے مزید کہیو جے ڈومینیکا دوہاں ملکاں غے بشکار تال میل نانہہ مزید بہتر بنان تے ترقی کرن واسطے وعدہ بند ہے۔ وزیر اعظم نریندرمودی نے ڈومینیکا غی طرفوں اس اعزاز غی پیش کش نانہہ قبول کرتاں واں کہیو ہے جے دوہاں ملکاں نانہہ مل غے عالمی مسائل جن مانہہ موسمیات تے جغرافیائی مسائل شامل ہیں ان ور رل مل غے کم کرن غی لوڑ ہے تانجے عالمی للکاراں غو بہتر طریقہ سنگ نمیڑو کیو جا سکے۔

Tribal Kishtwar

کشتواڑ غی ضلع انتظامیہ غی طرفوں تاریخی چوگان میدان مانہہ پلک اک بڑا قبائلی تہوار کی میزبانی کی جا رہی ہے۔ آکاشوانی جموں غا نامہ نگار نے دسیو ہے جے قبائلی آزادی کا جنگجو برسا منڈہ غا جنم دن غی تقریب دھرتی آبا جن جاتیہ غو اک حصو ہے۔

15 نومبر تیں 26 نومبر 2024 تک پورا مُلک غا گرام اُتکرش ابھیان یعنی اطلا عاتی، تعلیمی تے مواصلاتی مہم چلائی جا رہی ہے۔ جس غو مقصد قبائلی طبقات نانہہ اُن گا سماجی، سیاسی، اقتصادی تے قانونی حقوق با رے بیدار کرنو ہے۔ اس تقریب غے تحت پہاڑی ضلع مانہہ ثقافتی پروگراماں غے ذریعے قبائلی طبقات غی طرز زندگی تے رچی پری وراثت غو مظاہرو کیو جائے گو۔ یوہ پروگرام وزیر اعظم گا نظریہ دھرتی آبا جن جا تیہ گرام اُتکرش ابھیان غے مطابق ہے۔ جس غو مقصد قبائلی آبا دی غی سماجی و اقتصادی حالت نانہہ بہتر کرنو تے اُنہاں نانہہ اُجاگر کرنو ہے۔ اس بڑا قبائلی تہوار غے دوران اس خطہ غا قبائلی افراد غی طرفوں مقامی طور تیار کی گئی دستکاری، ذرعی، پیداوار تے رویتی ہنر و ثقافتی رنگا رنگی نانہہ دسیو جائے گو۔ اس تہوار با رے تمام تیاریں کر لی گئی ہیں۔ تے ڈپٹی کمشنر کشتواڑ راجیش کمار شون غی طرفوں کشتواڑ تے اس غے ارد گرد علاقاں گا لوکاں نانہہ اس تہوار مانہہ شرکت غی کھلی دعوت دتی گئی ہے۔ تانجے قبائلی طبقہ غی خدمات تے ثقافت غی عزت نانہہ منایو جائے۔

اس غے نال ہی خبراں غو یوہ بلیٹن ختم ہوؤ۔